

四庫全書

集部

欽定四庫全書

集部

苑洛集卷三

四

詳校官庶吉士<sub>臣</sub>李如筠

中書<sub>臣</sub>劉源溥覆勘

總校官原任中允<sub>臣</sub>王燕緒

校對官中書<sub>臣</sub>潘庭筠

謄錄監生<sub>臣</sub>薛振基

欽定四庫全書

苑洛集卷三

明 韓邦奇 撰

河中書院記

苑洛韓子河中書院記曰河中書院者故東嶽祠也世人言五嶽皆有神獨泰山神主地下死人人之死者皆隸泰山不與他嶽比故其祠遍天下蒲有祠在州東三里所州人率以歲六月歌舞爲會以樂神云爲其死者

之父母親戚解脫即弗樂神神且苦其死者之父母親戚云九川呂子云禮教不興而惟鬼之務有司者之過也今夫泰山非蒲人所可私事也古者禮德則祀食功則祀然制無僭神而饗無淫鬼也夫擊鐘鼓醺牲醴羣巫在前三老在後使其婦人女子羣集而奔走焉此天下之弊俗也夫魯有杏壇絃歌之聲至漢不輟何則教化行而禮讓之俗可作也語曰弗琢弗光弗闡弗明言教化之行自上倡之也故導則易流嘯則易蕝勢使之

然也孟子曰經正則庶民興庶民興斯無邪慝矣吾將  
正其經焉呂子毀其祠以為河中書院生徒入院而習  
業者幾百餘人呂子曰今夫學者羣居而相議也窮志  
而竭思月月而程之卒歲而計功凡以為道也舜之告  
禹曰人心惟危道心惟微惟精惟一允執厥中道之至  
也夫蒲舜之居也故度德而較功莫舜若也清如殷伯  
夷叔齊大如文中子王通正如文清公薛瑄善人如黃  
霸諸子皆于德莫可貶少而功及于蒲者也呂子遂即

書院為祠以祀舜以下呂子者嘗為吏科都給事中舉  
劾無所避忌而留中不出人所不及知者尚多至於甲  
戌之䟽指陳時事畧盡尤非人所敢言丙子冬中者出  
為蒲州同知呂子毀東嶽祠為書院也乃在明年五月  
云得屋殿寢廊廡凡若干間以其中殿為重華殿重華  
者即以祀舜配食者即伯夷叔齊王通薛瑄凡四人以  
東堂為名宦祠名宦者凡四十三人漢黃霸周堪田延  
年杜詩劉祐史弼杜畿晉王濬路述薛善元淑隋楊尚

希楊弘丘和党君素唐杜楚客蔣儼陸象先顏真卿徐  
弘敏姜師度郭子儀常陟宋晁補之范仲淹范純仁趙  
尚寬朱壽昌錢晦孫載游師雄郝仲連金張萬公巴圖  
魯完顏策丹額克元劉天孚拜珠哈雅靳克忠國朝康  
茂才徐政張廉邵童曹端西堂為鄉賢祠鄉賢者凡四  
十七人周段干木漢姚平司馬遷暴勝之胡建晉張華  
魏皇甫遐敬珍隋薛濬陳孝意趙綽故肅張文誦唐呂  
子藏敬播羅道宗柳範柳澤呂諲裴晁柳芳薛珏盧操

楊巨源樊宗師馬存亮胡証薛逢趙匡司空圖宋柳開  
李興姚宗明侯仲良金強伸王建筠龐整侯小叔田世  
英李獻甫陳元凱裴居敬國朝薛魯張福馮祥衛述楊  
瑩以旁殿為講堂五所以露臺為尊經閣以餘屋居生  
徒已而太守又盡取其舊屋而葺之為坊牌四為甬門  
一有扁為井二有亭檢閒田二百有八畝為祀養作新  
屋若干間又與同知為文告以諭意為條約以勸生徒  
太守者甲戌進士王君治蒲有聲民悅而安之先是時



太守適巡下邑不視州事故同知得自治書院事然卒  
成之者太守也於是太守與善之美翊正之功又可尚  
已昔者河水為患父老乃為河伯娶婦西門豹令鄴乃不  
為河伯娶婦而穿三渠以濟民民獲其利至漢時乃毀  
令所穿渠為馳道夫賢者作法不肖者疑焉君子所為  
衆人固不識也故曰善作者不必善成善始者不必善  
終言繼之者之難也二君之為書院也誠美矣予懼其  
他日之為鄴令之三渠也後之人可不念哉可不念哉

劉烈女祠堂記

烈女既歿三十年苑洛子為之傳有二十年郃侯始建祠考而祠焉既而伐石構亭將請文撰述本末而郃侯以卓異徵矣既而紀侯敷奏至京受郃侯之托歸而言之王侯陳侯永終是圖夫自光岳氣分人無全節雖芹宮碩士類朝燕闕而暮秦庭矧蘭室麗人能却魯金而完趙壁斯亦不足崇之廟貌薦之牲牷勒之瑣珉銘之彝鼎者乎此郃侯所以興思仰止表樹于前而王侯紀

侯陳侯所以濟美協心緝成於後也烈女者朝邑龍門  
村人也幼有至性長不踰閭從德度人針絲絕類雖目  
不知書而心涵大道足不履外而情見大觀若夫色雲護  
翠竹於階異樂擁仙娥入牕此又其母誕烈女之祥而  
兆之夢寐者也天人之際靈秀之鍾亦豈尋常也哉烈  
女幼字里舍兒未往之家而里舍兒死烈女聞之易服  
不食涕泣請徇乃復自謂死得其所重於丘山義或未  
諧自同溝瀆往就諸卞偉而質焉偉曰異哉斯女也夫

歸妹天地之大義從夫倫理之宏綱顧恒一之風久而  
不作而大過之行俗之所駭雖子之甚善如衆之所笑  
何烈女曰天下之理是而已矣苟即乎此心之安又何  
恤於萬口之騰哉乃改女飾脩婦容縊而死焉嗟夫西  
周之迹熄而鄭衛之風行塵聚之羞閭閻相望雞鳴之  
想風雨猶存故再醮之婦簷裝以自悅五姑之女冶容  
以媚人烈女雖綠蘿之傾惟陽是尚而芳梅之隕於春  
未知乃能舍生取義殺身成仁抑又何所為歟且其就

死之際詳擇所托雖化聖大賢之從容無以加此彼烈夫志士之感慨者未足論也非所謂得死非難處死為難者乎昔五泉大夫將採拾烈女之事入于縣誌執其傳而泣曰斯人也所謂建諸天地而不悖質諸鬼神而無疑百世以俟聖人而不惑者也嗚呼斯言也盡之矣夫其高標峻節絕操清風使君子興悲方之至理則千百世而下可徵矣夫仲尼臨河傷類而悲燕士適越見似而喜烈女之行尚矣邨侯王侯紀侯陳侯秉彝好德

之心興賢翊正之志亦不足稱歟祠堂正堂三間門房一座偉監察御史識高而行正故烈女質焉部侯名相澤州人王侯名思賢樂平人俱大尹紀侯名年曹縣人二尹陳侯名廷桂五臺人三尹五泉大夫里人韓邦靖苑洛子者韓邦奇作是記者也

高先生祠堂記

先生姓高諱翔洪武中以明經拜監察御史靖難之師至江上先生遂革除之義云邦奇自為兒童時徃徃聞

父老稱說先生事感慕咨嗟輒泣下數行願以文典未  
徵徒識於心未敢稱述會見侍御張君芹備遺錄載先  
生姓名官稱適五泉大夫韓邦靖為朝邑志爰命次序  
先生事于書而先生之事始白於人人矣當洪武時高  
皇帝甚眷注先生先生所奏事無不關國家幾事當上  
心者及革除文皇帝素聞先生乃召先生欲用之先生  
以衰服見語又乏膚敏左右遂兵之嘉靖元年冬郃侯  
來尹吾邑樂節慕古咨詢文獻惟日孜孜邦奇乃以先

生語侯侯曰嗟乎世俗之敝也久矣計利者忘義謀家者負國孰有殺身成仁如先生者哉夫當革除時變通之士比之惟初受他吉者多矣而過涉滅頂先生乃蹈之夫褒死者所以勸生者起頑懦而激民風相之責也乃建祠肖像於五衢之地俾過者居者咸有式焉事竣乃屬邦奇為文勒之石夫先生之沒至今百五十餘年而表樹之典始興於今日者豈前人好德之心或有間歟徒以先生為主之忠發於吠堯之節故論者徃徃以



為非時之宜耳昔者武王孟津之會順天應人夷齊乃叩馬而諫使當時非太公之言則夷齊亦刃下人也其后亦竟餓死于首陽之阿千百世之下武王不失為聖夷齊不失為賢然則祠先生者又何過焉練子寧方孝孺張鶚庵與先生同事者也子寧祠于江西孝孺祠于台州鶚庵祠于富平又永樂時有朝貴變姓名為子寧諱者文皇聞之曰使子寧在朕固當用之於是乎見聖人之本心矣然則祠先生者又何過焉

大理左寺題名記

余大理左寺諸君子伐石礱之為題名碑以文屬余夫石以題名文以述旨將以彰往昔昭後世示勸戒也夫名者名也名之題也名斯立焉孔子曰君子疾沒世而名不稱焉君子弗求名亦甚惜名也然名不貴苟得故君子篤實而輝光請以名實為諸君子告大理古廷尉刑官也昔周書訓刑大要有五曰清曰公曰明曰勤曰仁此五者刑之則而名由以成者也是故奉祿而訖富

清也則有清名循法而弗撓公也則有公名微暖情偽  
之必燭明也則有明名剖斷無滯以由慰勤也則有勤  
名匪削以入弗縱以出仁也則有仁名否則獲貪名焉  
否則獲私名焉否則獲昏名焉否則獲怠名焉否則獲  
慘刻之名焉善哉名之題乎懼哉名之題乎諸君子於  
名也宜無所苟矣是故忘名而名者名之上者也為名  
而名者名之次者也偽於中而飾名於外焉名亦末如  
之何已諸君子於名也宜有所擇矣經曰人無水監當

于民監張釋之于定國賢名至今焉張湯杜周厲名至  
今焉誠如是也千百世之久史為之碑而人心之公為  
之記雖無是石若文焉可也諸君子其圖名於碑之外  
乎建是碑者寺正孫裕寺副陳京吳瑀評事馮惠潘高  
李文鳳而為之文者余也余與諸君子又興事題名之  
首尤人所指者其於名也可不慎諸是為記

邵陽張侯救荒之記

歲辛卯當陽九之餘占之維旱雖多方受之而邵陽惟

甚郃陽為北山之坂去大河北洛五六十里或七八十里地高而土堅地高則恒風雲氣弗能交故恒陽土堅則不能受澤微雨則滋而隨焦大雨則奔流趨下地斥為溝直抵兩河之濱而後已獨潤雨而久禾乃生故他邑皆旱而郃陽之旱為甚侯有憂之稽之民謀之士籌度於心得救荒之策四馬惠而不費簡而不擾本之人情而無所拂請之撫臣撫臣佳賞令推行之侯乃停不急之訟罷泛常之役節浮冗之費循行周察專意撫安

於是亡者復餓者興郃陽之旱雖甚於他邑郃陽之民則安於他邑夫災厄天數也救災人事也天弗可逃人定則勝傳稱大猷之世無災非無災也雖有災弗能害如無災郃陽之旱焉能為侯之災乎經曰鮮以不浮於天時於侯有徵焉侯名道山西洪洞人嚴而不虐敏而果足以推行其仁愛之心云郃陽之士若民為之立石乃請記侯余門牆友也素知其賢因以是書之

同州重修州廨記

吾同郡侯唐公既新郡廨於是二守劉君漢倫節判張君朝宗贊郡岳君溥共立石以記其事請予為記是役也自經始及告成閱再歲正堂五間東西夾室各一間東西幕各三間東西廊各十五楹後堂六楹退思堂六楹皆極敞而更新之若創建也正德初予謁州大夫見廨宇傾圯適大雨州火夫傘於廳執事者棚席於廊余出而問諸民民曰太守貪不暇為也正德末余再謁州大夫其傾圯視昔加甚則風日弗能蔽矣余出而問諸

民民曰太守廉不肯為也夫君子之治國也如治家使其家之敝壞若此克家之子寧肯坐視哉夫貪則已矣幸而廉顧乃避勞傷之嫌慮侵尅之誣使公居廢頓至不可息何其愛身者甚重而愛國者甚輕也君子之心固如是乎皆非也嘉靖三年予復詣州謁侯見其煥然更新翼然壯麗矣予出而問諸民民曰太守賢百廢興焉然則侯斯舉也非所謂治國如治家者哉乃復問其費曰以千百計問其工亦曰以千百計夫費以千百其



用侈民將怨曰太守之取民也有道奚其怨工以千百  
其役繁民將怨曰太守之役民也有節奚其怨夫用民  
之財而民不以為貧役民之力而民不以為勞侯胡以  
得此治國如治家公也惟公也故民服民服故忘其勞  
且費也固宜民以侯為賢也亦宜夫如是則亦何害於  
廉哉侯姓唐氏名相字舜夫大寧都司營州中屯衛軍  
籍順天府薊州平谷縣人侯之善政多矣此指其振廢  
之一節云

澄城縣重修文廟記

余生華岳之下長而遊齊魯陟泰岳遊晉代陟恒岳遊  
梁豫陟嵩岳遊荆楚陟衡岳歷吳越觀於甌閩足跡將  
遍天下凡梵宇琳宮巍然壯麗有上擬廷闕者類皆其  
徒為之乃闕孔廟視學宮頽敝剥落甚者不庇風雨今  
官於郡縣者獨非孔氏之徒與且琳梵之脩建國有禁  
例若廟學又孰從而禁之哉侍御鄭公謫尹是邑未朞  
年政通民和乃撤文廟學宮而重新之神有依而士有

業羣情大悅於是學教諭訓導率諸生來問記若公者  
其真孔氏之徒歟余讀宋史至循吏傳意其人必吁吁  
煦煦無所動於民也及觀其治行乃肅紀綱正法度闢  
田野實倉庫捕盜賊濬水渠繕城池抑兼併脩武備謹  
置郵禮百神興學校於是嘆史臣之有識也若公者得  
不謂之循吏也哉公之素善余已備識於樵樓記其行  
已立政皆孔氏之徒也豈特廟學之脩而已哉使琳梵  
之徒見之亦將嘆曰吾輩方行天下獨見鄭公耳公諱

光溥山東益都人起家進士

重修城隍廟記

我太祖高皇帝誕膺天命為百神主洪武元年詔天下郡縣建城隍廟封爵有差以帝以王以公以侯以伯五等以爵不應經意改稱本號司官民善惡凡吏於其土者始至必齋宿廟舍先與神誓而後視事祀孤魂則以神主其祭蓋寄以幽明之責誠要神也古不載祀典唐李陽冰一為縉雲城隍廟碑其文不過三數行然亦非

制也我高皇帝始著之令典徧祀於天下聖謨幽潛神  
道設教之心度越百王矣吾邑城隍廟成化中祥符李  
公英增拓之弘治中南陽蘓公槃重新之嘉靖初澤州  
郇公相再新之二十年來朽蠹剥落日就頽圯今劉公  
始加脩復夫有司之職治民事神二者而已然惟賢者  
則敬神否則自絕於神何敬之有故賢者惟恐神之不  
靈不肖者惟恐其靈也賢者潔已愛民弗得於人將求  
之神是故惟恐神之弗靈無以鑒已之誠不肖者黷貨

虐民外欺乎人必忌乎神是惟恐神之靈以燭彼之隱然神之靈不可昧也自廟之建垂百七十年而中間長於斯佐於斯幕於斯不知其幾而脩之者四公蓋皆循良令也故於神崇焉是役也不取之民不取之官於有罪者從惟輕之典以示罰故用而不費成之速而民弗知勞劉公諱尚義晉之汾州人以名進士拜監察御史謫判秦州稍遷至今職其先大父諱志嘗丞朝邑亦以廉著云

思萱堂記

情有所感弗能已則有思思之甚而無所泄則必有所  
寄古今之人或為之碑或為之臺或為之觀皆所以寄  
其情而泄其思也然情之真思之篤有弗可以物釋弗  
可以理慰弗可以命喻則惟親耳此仁人孝子窮天終  
地而罔有所極者也王母任孺人卒其子生璵生璇生  
珙既盡其哀矣殯矣葬矣為之誌為之表矣思之不置  
乃為之堂且為之扁乃又請余為之記夫王生之思是

蓋出於天衷之弗能自己者也乃若思其居處思其笑語思其所樂思其所嗜念念而思哀哀而慕朝夕如見焉此人子之常耳王生其知所以慎思乎夫父母之於子無所不用其情則子於父母當無不致其思節飲食謹動息履薄圖全思其疾之憂也澄心志勵操行博施於禮愛思不虧體以遺辱也勤儉立其本輯睦達其用思以用宏家賁也樹功名闡經濟用光佑啓思所以顯揚也慎此四者可以為子矣否則雖嘔心而出子道何



加焉孟子有曰大孝終身慕父母王生其勿遷乎璦璇  
珙皆學生璦璇余門牆友也乃為之記

仇氏安貞堂記

易坤傳曰安貞之吉應地無疆安順也貞正也順而正  
婦之道也地道也坤道也仇氏名堂之義蓋取諸此仇  
氏為潞大族爰及高祖給事君始範于家内外是正子  
孫嗣守之五世矣今惟宿州吏目君楫藩府儀賓君森  
又撫張其緒于是作堂以申教曰有序曰同心曰安貞

登堂各有訓言每旦會集以禮長而誨幼則于有序堂  
男之會食則于同心堂而安貞堂則女之會食之所也  
有序同心訓語載仇氏家傳安貞之訓曰昔我高祖勞  
于作家詔我後之人凡我內人勿竊勿妬勿不順勿迷  
夫子勿多言以幻是非而二我骨肉有一于此庸壞我  
高祖之訓將舉禮議法以行夫仇氏之家既已正矣吏  
目君儀賓君思皇思武篤叙弗已者以懼夫極而變久  
而湮將永終之難圖也夫貞又固也固者所以永終者

也考之于易漸之女歸則正始之貞家人之無攸遂則從夫之貞恒之從一則終身之貞察夫是三者而女德備矣又家人上九曰有孚威如終吉朱子曰正家久遠之道也然則家之正固在于女之貞而所以為之則者主家者也仇氏之訓諸家也而并庸是以告之而後之人克嗣服之又何患乎終之不可圖哉仇氏取易之義名夫堂吾故始終以易告焉吾邑侯王公數言仇氏之家訓也吾以是詳于仇氏而為之記

朝邑縣大慶關創建成城記

大慶關新城既成周圍一千二百步高二丈五尺厚下  
三丈頂二丈關士耆老介國子生趙子瓘來問記夫集  
事非難得才為難才得而事舉矣負才者多知要者鮮  
才而不知其要則事僨矣故曰人存則政舉言得才也  
所惡於智者為其鑿言不知要也廣陵之盜人莫能治  
天下以為難張綱一至而平之鯨之才雖虞廷諸臣亦  
皆推讓而卒汨陳其五行是豈才之不足哉易曰易簡

而天下之理得矣然則治平之道易簡而已矣易簡者才而知要之謂也甲辰歸正人數言北敵欲擁衆下平陽掠蒲坂渡河西入關內人情洶洶大中丞北村路公相山川察形勢謂夏陽以北兩崖山險敵不能渡南至潼關曠然平地而朝邑大慶關其衝也謀築城以戍之且慮工大難舉非得人不足以圖成察庶僚惟吾郡二守朱公也委重焉公至甫一月西北二工告成余問諸民曰功大而速民其苦矣民曰無苦也朱使君平易近

人不作刑威順衆情布公道與士庶父老圖謀議擬用人若已惟善之從䟽食之餘躬親勸閭故民忘其勞焉若公者可謂達易簡之理矣彼悻悻呶呶者舞機變眩智能中藏私慝毒痛生民何益哉余家食來既病且懶未嘗出里門聞公善而私徃觀之公聞之邀余入坐曰淳哉朝邑之民數千人一呼而至無脫役無惰工官不勞而功速成余駭然而驚愴然而嘆曰吾入仕來幾四十年凡蒞乎民者皆苦民之難治而怨忿之而公獨歸

德於民焉異哉斯言鬼神聽之予出而問諸士何朱公之不尤民也士曰先儒有言無求取於人則不尤人宜公之歸德於民也公其達易簡矣乎既而工皆告成士民又曰料丁夫公僉派先後勞來以播民和則二尹王君相成之力也終始給事則本闕巡檢黃鑑高陵典史耿臣余曰皆實錄也遂書以為記朱公諱光霽句容人王君諱戟觀城人

木軒墨跡記

弘治甲寅

木軒余友也其締交也志合陳雷情投膠漆之好墨跡者木軒漫筆也及其別也白樓滄海不勝雲樹之思偶檢篋笥中得墨跡焉展而玩之明珠拱壁猶照顏色乃裝潢成軸而懸之且為之記木軒浙東天台人也秀稱人傑粹稟清資余闕內長春人也志在四方情篤友誼乃於弘治中歲維壬子月應黃鐘相遇於福州南臺之上夫兩浙三秦相遠萬里非西北東南之極乎矧夫出  
水園瘴江之潏三山俯烟海之洋南臺之區又千餘里



矣於是乎異國萍逢同心蘭契盍簪脩伐木之情傾蓋  
結斷金之友夫豈偶然而已哉余常聞天台山水之盛  
佳麗瑰奇甲於天下心切慕之而身未之登臨也與吾  
木軒交如入芝蘭之室倚瓊玉之屏則固神暢於建標  
之霞心沃於界道之水冰雪逼人清涼透骨矣夫申毓  
嶽降眉濯蘇生地靈則人傑吾不知赤城之為木軒而  
木軒之為赤城也斯時也余與木軒年各二七髻未纓  
冠問道登蕭朱之門論文分王楊之席晝倚芸窗夜燒

薰篆未嘗頃刻之相違也而梅亭風雨之宵時酬麗句  
芋原鶯花之候每倒芳樽蓋五年於茲焉一旦碧簫吹  
月聲斷陽關錦瑟華年歌殘南浦烟帆畫舫木軒之北  
下也夢繞荆門雨蓋雕鞍眇末之西歸也魂銷灞水物  
存人遠覩物思人愛其人而亦愛其物見其物而如見  
其人墨跡之記也如此

王氏世德記

善必積而後大澤必衍而後長古今世家名族類則然

矣今讀王氏乘而知吾友友山子之所以大也王氏自  
善以來稱善世自聚以來占仕籍而友山子興王季金  
昆桂枝寶樹聯翩科甲光耀士林可謂盛矣孰非友山  
子之餘乎王氏乘者友山子子潼谷府伯自述其家世  
之典因以問記云王氏之先本大梁人自善始避亂居  
朝邑之伯子村善以下無可考幾世而生佐佐生聚以  
材選歷永濟奉新驛丞調全州局大使性仁信寧受人  
欺不疑人也聚生斌以邑掾授中年典史居守官廡中

牟人頌之以子貴贈戶部主事斌生旻字汝器成化辛卯中式入太學司成丘公試其文佳甚器重異諸生弘治庚戌登進士歷官戶部郎中屢上封事謫阿迷州同知遷和州知州調亳州稍遷至蘇州府同知免官歸太史王羨陂稱其負志挾氣吞吐風雲排擊山嶽謂卿相可立致也所著有養浩論綱目兵法子六朝璽字國重監生有氣岸不苟屈用世之志老而不衰故號益壯齋母歿廬墓三年朝雍字仲和即友山子也初名朝璽丁

邠秋試夢甕去底榜出為今名蓋監臨易之也別號友  
山子授嚴州府推官歷澤州知州懷慶府同知陞南京  
戶部員外郎郎中山西按察司僉事疾作潼谷君迎養  
府邸卒友山子擇言而發慎行其餘資性英懿才識宏  
達富有淑乎生徒敦睦刑於家室蓋儒者之行非以文  
學論也其治嚴及澤也法嚴行恕政平訟理上信其賢  
下懷其惠泣而畏且愛之去而思且頌之蓋循良之治  
非以功名論也所著有燕石稿板行之朝流字仲冕丁

丑進士授三河知縣調鹿邑陞宿州知州未任卒三河  
權銳故里也時銳貴震天下生殺予奪出於造次仲冕  
守法不阿屢忤其意故調史官韓苑洛稱其當正德時  
羣閹擅權疇敗倫斃天下靡靡而歲寒顯後彫之資風  
急見獨搖之操仲冕其人也朝望字德輝縣學生早卒  
朝璽字季良乙酉鄉進士授獲鹿知縣調永清朝璋國  
重二子三策生員三獻友山子五子三省字誠甫所謂  
潼谷府伯也癸未進士歷官保定府知府年甫四十餘

以疾懇乞歸歸來誦讀述作疊疊不倦如書生三知三益三畏俱生員三至三恕仲冕子二三俊生員三傑德輝子三讓季良子一三復朝璋二子三聘三友潼谷君子傳鄉進士登第時年甫弱冠也王氏自善翁著姓朝邑世有聞人時稱顯族而諸生粹美敏秀皆可大成潼谷君時雖養晦然徵諸今昔文學政蹟山川其舍異時膺薦而興名位建立豈有量哉至如友山子即其所至使生春秋時可預速肖七十子之列當先漢時雖與龔

黃同傳可也可謂淳且大矣嗚呼王氏其盛矣乎自佐翁而下世次刻之碑陰自德輝而上行業載之誌表茲不詳書云

邵陽增脩城學記

邵陽王侯增脩城學既即工侯僚屬暨邵士大夫介司訓楊君琳茂才褚子鏗來請記夫城垣固地方重務在今日尤所當先學校固六事首政在邵陽尤所當急初自庚子以來北敵入雲中掠至太原入上谷掠至完縣



入上郡掠至鄜延辛亥春歸正人傳言敵欲犯三原撫  
臣檄下郡縣戒嚴郃陽故城女牆土歲脩歲損民苦其  
役閱視使者至飾以灰而使者又不時至或妨稼穡侯  
易以磚城故有損薄增築之郃陽古形勝地也被山帶  
河環以深塹得人以守雖數萬之敵環攻歲月亦末如  
之何也書曰申畫郊圻慎固封守以康四海是宜泛然  
興作而已乎郃陽自乙酉以來脫鄉榜幾三十年更於  
土者每下視之神宮學宇傾頽至不蔽風雨侯徹而新

之且為通道已酉中式者一人郃陽古人材區也自周  
卜子夏漢司馬遷之下代不乏人

苑洛集卷三

欽定四庫全書

苑洛集卷四

明 韓邦奇 撰

廬州府同知贈通議大夫都察院右副都御史顧

公暨配周太淑人合墓誌銘

晉顧榮之後有裔孫廬州府同知曰似翁士則孝廉治則循良號似齋鄉學士仰而尊之也稱似翁以子南京刑部右侍郎秋山公巡撫時贈通議大夫都察院右副

都御史云太淑人女稱曰淑婦稱曰順克逮君子亦以  
秋山獲封云翁生於成化乙酉七月初八日卒於嘉靖  
壬辰正月初九日享年六十有八太淑人生於成化戊  
子十二月二十有六日申時卒於嘉靖丁未十一月二  
十日丑時享年八十秋山及兄弟將以戊申年

閏月

日合葬於姚之烏戎湖山之陽以端溪少司空王公  
瓶山大卿項公狀問誌銘云翁諱蘭字斯馨浙之紹興  
府餘姚縣人也其先本會稽人八世祖曰華甫以明經

膺元世祖聘授安慶知府左遷餘姚嵯司副使始附籍  
餘姚高祖考諱斯道字汝立號一齋以鄉貢為樂平府  
經歷妣陸氏曾祖考諱善敬字克恭妣丁氏祖考諱敏  
義字邦直妣汪氏父諱駿字天馴號澹庵贈都察院右  
副都御史母應氏贈淑人皆以秋山貴也太淑人姓周  
氏亦姚之大族也父諱瑞母徐太君門第相若故結好  
云翁幼而穎敏從伯父驥學禮經又從邵公文威邵博  
學敦德名儒也自是翁所造益宏矣弘治甲子月湖楊

公典鄉試得先生卷動容稱羨遂登名魁亞明年乙丑  
南宮弗偶入太學監期將滿聞澹庵公疾告歸養大司  
成楓山章公留行俟附選翁固辭章公大加器重踰二  
年澹庵公卒翁居喪葬祔虞祥一循古禮正德辛巳授  
大名府判職專捕盜翁多為間諜所在擒捕無遺地方  
以寧壬午河南大盜上堂擁衆犯山東河北中外以為  
憂翁躬率驍勇扼其北渡無隻馬犯境者恒滑諸郡縣  
瀕河善崩築塞之費歲以萬計極聲不息旋即衝決少

司空章朴菴公檄翁治其事河政大脩用省而功倍矣  
濬滑民饑翁煮粥多所存活又以米價騰貴緣鼠孽潛  
熾商旅弗通也乃分遣義兵四出巡邏舟車始無阻趨  
利者盈道價折若有年甲申入賀至保定有盜將犯翁  
問知翁也曰是大名慈惠顧使君兒郎輩豈得相犯竟  
引去翁佐郡七年撫巡當路薦者七獎勞者四十餘銓  
部上翁最贈澹庵公如其官應淑人封太安人太淑人  
亦封安人已丑擢廬州府同知甫三月聞應太淑人訃

歸葬一如澹菴公禮逾三年卒鄉之大夫士識與不識咸悼惜之太淑人幼警慧織紵烹調不習而能在閨時遇父母疾即憂不自安太君曰吾女以事父母者他日事舅姑當婦德矣及笄歸翁事汪祖姑澹菴公應淑人備極孝養澹菴公喜曰得佳婦矣翁邁疾幾三年太淑人湯藥省伺朝夕忘瘁及翁官大名廬州每當行縣太淑人必局鑰門戶戒僮僕無私出每家宴輒語翁曰民猶子也財民命也撫其子而忍夷之命將誰與我人謂



翁之賢太淑人內助居多翁歿諸孫皆幼太淑人躬自  
訓飭務令讀書知禮節俾罔墜於家聲又督諸婦務勤  
儉去奢靡皆身先之性好施予卹貧至解衣脫簪珥翁  
好學不倦士多從之遊其最知名則桂林工部侍郎蔣  
公淦屠公楷兵部郎中鄭琬同郡廬江尹吳迪進士俞  
大有南康判沈有年沒後十餘年提學徐少湖舉入鄉  
賢祠大名守張鄮西舉入名宦祠兩血食焉太淑人雖  
未學文然曉識大義當封時齋戒焚香拜闕受恩既而

泣然流涕曰我先大夫勤苦沒世獨不見此傷哉秋山  
每迎養輒不往曰我冢婦也當奉先祠秋山轉刑部以  
太淑人年高延緩圖終養太淑人不悅曰汝但盡心王  
事勿以吾為念汝不行吾不食矣秋山始之官嘗聽諸  
孫讀舜完廩事曰吾家免此矣又聞讀小學失節事大  
餓死事小曰諸婦聽之但不願見此也子男四達同安  
訓導遂所謂秋山者也正德中諫上巡遊杖之闕下遠  
早卒達國子生孫男八廩大理評事袞國子生庶序爨

俱學生庶燮褒曾孫男四女二銘曰難謹者天可謹者  
仁維仁之先克孝於親維仁之實施德於民允迪君子  
似翁其人嗟嗟乎似翁道遠而位邇畜亨而施屯乃蕃  
衍於嗣世奚必於其身端溪之狀所謂不可欺者天足  
以上格鬼神者邪維太淑人閑閑內行維此顧氏一門  
之盛邇其源咸太淑人中弼之餘慶也於衍猗衍姚山  
之野外列四獸中容萬馬鬱鬱佳城以待仁者永福永  
譽千百世之下

一峯屈先生墓誌銘

太華之陰渭水之南有斐然君子屈先生卒年八十矣  
先生溫乎其恭肅乎其矩坦坦而易侃侃而直廣顙美  
髯神健骨聳風格峻偉望者生敬焉竒自童子時即識  
先生今竒已班白矣而先生卒嗚呼傷哉先生孫生員  
作奉都御史華峯先生狀來問銘華峯先生為先生姪  
鄉之名德時之貞臣也其言固足徵云先生諱弘智字  
鑑之號一峯姓屈氏其先楚之公族漢高帝徙齊楚豪

傑於關中始為華陰屈氏曾祖唐始宏厥家祖文通以  
才行著聞洪武中高皇帝欲官之文通不欲仕附軍籍  
免守令辟脩西嶽廟禮遇之且令一子為生員父韶字  
九成弱冠充縣學生以文章顯名闕輔入國學祭酒司  
馬公器重之試陞上舍後授山西隰州同知有遺愛見  
三原王端毅先生墓碑母李安人勤儉治內以婦道稱  
族里先生生而穎秀七歲入縣學三髻能文遇試援筆  
立就每出奇語既長博通子史前後提學憲使多器重

之或錄其文傳示諸生故關內士多願交先生而先生亦好納識豪傑由是先生名益著然阨於天凡十一應鄉試竟不第初成化乙未創建白河縣臨川伍憲使徵先生充白河生先生曰俊乂之士便當魁名天下乃不能自立于鄉邑而欲就僻邑之廩哉且吾父母老非人子遠遊時也至正德辛未創建紫陽縣寶應朱憲使以先生年幾六十弗第徵應紫陽貢亦不就庚辰先生年七十矣乃嘆曰古者七十致仕吾尚可為諸生也哉士

之弗遇古今亦不獨弘智也棄其廩就閒信陽何憲使  
亦素重先生與之諸生服終其身自是杜門謝事當世  
顯貴人雖素交厚亦不與面惟理先墾脩祭祀教子孫  
耕讀而已暇偕華峯先生講說今古辨析聖賢微旨每  
至分夜或燕服便巾徜徉於華麓渭濱之間忻然自得  
曰此皆樂地也先生情靜識遠畏義好德恒以天理人  
心陰隲感報勸示家人因人之行而預占其禍福皆中  
云配李孺人亦以內則聞子男二長鈍娶張氏繼馮氏

次介娶牛氏女二長適聽選官李松次字縣學生牛文  
驛卒孫男七奮聘丁氏企聘丁氏作娶馮氏喬娶府檢  
校李世芳女倬偉常童俱幼孫女四長適都司吏萬泰  
次字丁受餘未字曾孫男一天赦鈍等卜是年十一月  
十日將葬先生於臨渭祖塋之次銘曰彬彬先生有斐  
其儀經明行脩乃阨於時嗚呼先生如圭如璋如瑚如  
璉君子之章白河弗屑紫陽是棄鵬搏之志鴻漸之翼  
天不可道實命不同其羽可飾匪塞匪窮匪塞匪窮令



名不已而耕而讀爾孫爾子維渭之南維華之陰馬鬣  
崇崇鬱草茂林匪地之祥維德之吉先生康哉過者是  
式

岢嵐州判官周公墓誌銘

公諱文盛字時中別號中立其先陝西富平人洪武初  
調潼關遂為潼關人高祖清曾祖璟祖鏞父廣陰陽學  
正術母洪孺人公天性剛敏儀度魁梧弱冠為衛庠生  
鄉試累不第弘治癸亥歲貢入國學正德丙子授鳳陽

壽州管馬判官適郡大旱數月不雨尋復大水漫城公竭誠致禱皆有奇應撫院檄監正陽鈔關關者利府也當是任者多自敗公獨無所染商人稱便焉關有江西豪商汪強專關利徃徃局負諸商商人苦之然素險健善持官府陰私人莫之誰何公既監關民吳淮者訟強負其貼舡金強初傲然不服公以計出其所負金以示之強語塞嚴刑以徇關人畏服庚辰武皇南征時權彬用事諸將依憑寵靈威福生於造次公允馬淮揚間軍

務又重馬芻茭且萬計公處之裕如也壽之額馬歲徵私  
歛不勝其擾公奏言馬每匹宜徵銀十八兩而民困始蘇  
至今以為例後以公事誣罷巡按任君辯復之然代者已  
至矣公即浩然西歸家居及三年有以出處之迹不白激  
公者公復就仕補山西奇嵐州州久缺長貳事弛民玩公  
至不一月政法大脩後署興縣適歲大饑流民集至興人  
欲逐之公曰彼民即吾民也給米僧寺為粥以賑偏頭等  
處賊衆數百人據寨為亂劫寨民令不敢動及賊敗言

民皆盜民亦洶洶自為備上司疑之以屬公公單騎詣寨  
民爭出自辯所活甚衆或曰民與賊同處今辯之或當公  
以故縱其何以辭公曰辯寃得罪所甘心也戊子致仕  
歸公生于天順甲申八月十有四日未時卒于嘉靖辛  
卯正月十有八日巳時享年六十有八配余孺人子男  
二長鳳來例授散官娶宋氏次鳳翔太學生娶宋氏孫  
男五女二鳳來等將以今年闕月闕日葬公於金盆  
坡祖塋之次鳳翔奉孫生承賓狀來問銘銘曰賢哉公

也世之沾沾立名者寧殺人以自潔萃冤積枉上千天和越至於今矣偏頭之伸理何其廣也淮陽之役顧不難哉憲臣太僕其凡幾也馬之擾乃過於公夫非有才度者乎若夫退漫城之水回彌時之旱稽之庶徵亦不可謂之適然也嗚呼賢哉

嘉議大夫都察院右副都御史西野曹公墓誌銘

正德己巳五月二十一日未時公卒初丙寅以來八黨

擅權而瑾尤肆毒中外稱為內相凡藩郡入為京官必重賄方免禍曰方曰千方者萬金也干者千金也見則長跪稽首內相不為禮丁卯公自巡撫延綏都察御史回院公弘治中所造士也不習諛阿禮又不知賄事適朝廷十日不御門或曰盍先謁內相公曰未見天子而先謁權宦邪不見瑾固含怒後見瑾又長揖不拜瑾佯問入京幾日示見遲意公曰十日瑾又言都御史知回院故邪公曰聖恩也瑾復問何以報稱公曰都御史風

憲官振肅紀綱激揚淑慝耳瑾怒目揖公出公歸即上  
疏乞休不報旬日再疏亦不報時瑾嚴勘天下錢穀以  
中士夫禍勘使者希瑾意言延綏布糧浥瀾過緣主者  
公適丁外艱所司奏公當守制瑾乃罷公官聽勘竟誣  
公償布五百粟千石立限繫家屬緩則將籍公家公亟  
盡鬻世產完報然瑾怒未解也公隱憂發憤端坐不疾  
而卒明年庚午瑾誅朝廷遣官諭祭且給金營葬及今  
葬事且不能如制而墓銘尚缺即此葬誌亦足以徵公

長者云公姓曹諱鳳字鳴岐別號西野河南汝寧之新蔡人也高祖諱世隆曾祖諱恭祖諱英考諱端以公御史時封如公官性度夷爽廉信不苟妣劉亦以公貴封孺人貞靜慈淑為中饋式天順丁丑十二月初九日午時生公前一日孺人出舂於外歸見火光如車輪當其前明日公乃生公生而靈異比就外傳畧加訓說即了大義甫三髻舉子業精粹度越諸生尤以檢身斂心為務天台陳公選大儒也督學中州甚器重之曰曹生非



他生傳也成化丁酉以詩經鄉試中式辛丑登進士除  
徽州府祁門知縣少年初試或為公難之曰祁土浮俗  
偽且健訟當思以處之公曰若使我先逆民耶逆必設  
機械不得則重刑將有悞罹法網者卒不以偽逆祁民  
凡訟至分下都長虛心考其成隱奸巧詆莫遁其情然  
亦不深疾也祁民愛之於是祁門治行為最而當時徽  
之諸邑莫不推先祁門者三原王端毅公為冢宰雅知  
公弘治己酉公考績謁部奏薦陝西道監察御史陝西

王公鄉也當孝廟熙洽之世公獨持風裁崇論正議多  
所嘉納嘗奏事失儀鴻臚糾上上特宥之謂左右曰此  
曹御史也好官當畧其細過辛亥御史奏績於是封公  
及劉孺人皆獲封焉巡按江北賴僉事某教虐不戢公  
將論之然僉事素善持人短長且嘗忤公而賴新蔡又  
甚邇或謂公曰此易興謗階宜寬之公曰身為風憲而  
避嫌不激濁必將挾私而傾善矣竟劾罷之一路肅然  
御史七年陞蘇州府知府蘇州富饒甲天下俗迺奢靡

且崇祀非鬼親死則多火之公下車首置義塚以畀貧者而禁火葬定婚喪禮不得過制凡餞迎時序一切務從儉素違者刑之毀淫祠政平訟理而當時各郡又莫不推先蘇州者弘治壬戌述職入覲時宰臣奏宴天下賢有司於廷公與焉蓋異數也尋陞山西左參政湖廣右布政擢都察院右副都御史巡撫延綏地方孝廟時寇久不入疆場無警武備稍弛公涖鎮則嚴部伍實倉廩謹操練明賞罰推誠馭下將士感悅各思効力終公

之任寇至數止邊外無內掠焉回院而遭瑾禍卒享年五十三歲云公性清介孝友誠謹私居終身不御紈綺不畜婢妾不問貨殖父母兄弟無間言與人和易不為矯激之行處鄉黨恂恂煦煦若無廟廊貴者宦跡所至遺愛在民祁門則豎碑立祠蘇州則誌列名宦延綏則將士戴服至今猶有過其宅墓而問且拜者至其不屈身於權瑾危行大節稱重於天下余總河道時公孫亨守究以循良聞上交下交無抗行無過禮余心異之及

詳公狀乃知公家法源流公豈真屈而莫伸邪配劉封孺  
人繼郭氏子男一大夏以亨貴封承德郎刑部山西司  
主事娶張氏封安人女三長殤次適邑庠生員吳一中  
早孀守志季適生員張葵俱劉出孫男三長立生員娶  
孔氏繼張氏仲亨即守究而著治者也今陞湖廣按察  
司副使娶王氏繼孫氏俱封安人季賈崇王府典膳娶  
李氏曾孫守訓守純守約俱幼劉郭今悉合葬於公域  
主事封君以翰林吳公狀來問銘銘曰仰維古之君子

居常奉職而不求異於人及其臨大利害則皎然屹然而不溜不磷吁嗟乎末世於九沾沾之節儀人莫如我何者而攘臂為之至於一闕大利害則退然遠避索然消沮而心膽墮地矣休哉懋哉夷考公行古之君子公與之并維汝之陽有蘆其崗隱隱隆隆公之幽堂視此銘章非公一人之慶乃邦家之光

中順大夫四川等處提刑按察司整飭松潘兵備副使前山邵公墓誌銘

公諱鏞字伯倫別號前山邵氏之先太平府當塗縣延福鄉人高祖諱興從高皇帝渡江功陞羽林右衛右所正千戶後文皇帝北征改長陵衛仍籍羽林曾祖諱貴祖諱偉父諱瑛以公貴封承德郎南京戶部四川司主事母徐封安人生子三長欽仲鉞皆先卒公季也幼聰敏端重大異羣兒年甫十九弘治辛酉鄉試中式正德戊辰登呂柟榜進士以親老懇乞南部授戶部四川司主事三載考績封公徐安人皆獲封大司徒悉公廉慎

數委徵商稅公皆辭不奉檄懼利所也尋陞郎中司有  
羨餘數千金悉藉之官人皆推重郎中而郎中聲稱籍  
甚鄰舍郎公出妻數毆其妾妾苦甚自垣缺奔入公舍  
公適宿風徐安人轉送一同官郎家而公乃以形迹疑  
竟出知雲南府公身蒙重謗畧不自沮益自砥礪雲南  
郡乃稱治巡撫何公尤深賞識何公征十八寨擒捕者  
衆公殫心推鞠少疑似即開釋乃務好已者顧譏其太  
自信弗恤也前軍亦俘數百臨刑稱冤雖言語侏儻難



曉而情狀慘切可矜公以身蔽之為求死語覈果無得  
俱放歸復諷紀功風憲多方辯驗從事者多斬羅婦冒  
功公驗以水法即仰伏異狀莫掩其偽自是羅婦無橫  
死者捷奏有白金文綺之賜前守下車慮要囚越獄輒  
重篋之多死公食饑療病矜恤周至然獄亦無虞也後  
公去日哭聲振戶外貧民逋負者多錮死公令他有罪  
者代完而免其當人兩蒙惠城門閉其中兩司以上至  
始啓郡守即不得由公白啓之銅課掌於中官公取以

隸府其他善政隨事施澤滇人戴頌撫按交章論薦知府嘉靖癸未陞四川按察司副使備松潘松潘去成都千里山險途隘轉輸甚難公設法遞運人不告勞邊餉充溢軍儲折色收發副使道主之火耗羨餘留之道公止收批文銀之出納付之衛有尅減即罪主者護衛軍守南路者谿澗僅容一騎諸軍魚貫而度賊偵護軍來乃多阻險計殺之兵司無可奈何賂以茶銀始免公設謀掩捕夷其巢立一堡三墩於上絕松邊一巨害撫巡

聞於朝倉大使田文秀為土番強酋所殺虜其妻女公  
勒兵捕獲斬二十三人被虜妻女官送還鄉邊地人不  
知學公拔秀延師躬臨考閱及今士彬彬若內郡風洞  
關山高入雲表四時積雪不消北風一作六月如冬戍  
士畏寒多亡去公厚給衣糧節其代期申嚴號令恩威  
並施士無亡者遇寇發主帥惟遣將校公乃撤蓋乘馬  
身先士卒主帥自是亦被執出叅將某不法公按治之  
軍中畏服解之西築運籌亭日居其中左右立二碑左

圖山川險易及土番出沒之處右刻其豫儲選將之法  
攻戰器械之詳撫按復交章論薦副使而副使以親老  
乞休章三上皆不報初雲南一知州私土官後母欲爵  
其子且受重賄而誣殺土官事覺賊露公當知州抵罪  
法及公入蜀知州姻家者同寅深恨公會其弟御史雲  
南清軍云知州枉釋之犯罪者通判賍多弗能完清軍  
謂通判引公實分賍否則禁死矣通判從之適公遣僕  
至雲南領未支薪金清軍偵獲之曰此乃公賍然有字

可辯則減其鑿因劾公公累疏具悉事白薪金給公丙戌入覲竟以鄰舍郎及此事疑罷公官公長嘯拂衣而歸既而喜曰得遂吾養親願矣自是事二親竭孝無方初南宮不第歸益勵志讀書每焚香告天願減壽一紀得早遂祿養孝實天性也後封公徐安人次弟卒塋祭以禮事兄嫂撫諸姪恩禮篤切親友貧無棺者賻之女不能嫁者賙之家食二十餘年一字不入公門絕口不談時事惟二三知友飲酒奕棋而已巳酉夏疾作每誦

淵明自祭文曰陶子將辭逆旅之館永歸於本宅且曰  
吾足矣吾足矣至秋將屬續謂其子恒吉曰顧七知我  
托為我狀能白我受誣二事吾瞑目地下矣二事鄰舍  
郎妄奔雲南府分金也又曰必苑洛子誌我墓遂卒恒  
吉奉狀請苑洛子按狀而申之夫自昔賢人君子蒙誣  
負毀者多矣然未有不卒白也歐陽文忠有帷簿不根  
之謗馬援有薏苡明珠之疑然千載之下豈以二公為  
貪墨淫婪人哉實安能掩也公生於成化壬寅十二月

二十七日酉時卒於嘉靖己酉七月十六日丑時享年六十有八配金安人子男一即恒吉生員娶某氏女一瑤姜適錦衣百戶林岱早卒孫男一曰如阜尚幼恒吉將以年月日塋公於大店坊喬家山之新阡銘曰司農利所飭爾簞簋滇南訟獄實得金矢赫赫憲使松潘底平爾鎖爾鑰斯干斯城孰塞爾晉孰蹶爾行載鬼一車貝錦乃成歐陽文忠帷簿不根明珠薏苡嗟嗟馬援不理於人不獲於天嗟嗟君子自禱心田矧有顧七我勒

銘章靈神洋洋瞑目玄堂

河南府通判王公墓誌銘

公諱道字純甫世居澤之陵川故曰陵川王氏公遜其懿故號曰倥侗氏陵有六泉故又號六泉氏鄉試中式授朝邑令陟臨洮府判起復河南府故人稱為王判氏高祖曰九成志操孤潔不樂進取曾祖曰玘祖曰景祥經明行飭為儒學生父曰璋七品散官母曰韓孺人著家範故又稱為世德王氏

潘大夫登其堂題之曰世德王氏之堂有記

公生



六歲而韓孺人卒大母張孺人保育焉時其寒燠饑飽而衣哺之節其出入起居而提携之防陵損而護衛之擇師友而教誨之是故公獲成立焉其行也脩其養也孝其士也名鄉人禮之邑宰奇之諸生推之是故朝邑之政舉焉正德丁丑公至於朝邑嚴捕緝故盜賊息明聽斷故詞訟簡清荒稅故貧困蘇崇文獻故典籍具服上禮下故聲稱洽是故天官推擢焉嘉靖丙戌公至於河南河南多盜設判捕之公知盜故獎令曰里人弗發

覺者有常刑受命弗戮力者有常刑以賂故縱者有大刑怙勢藏匿者有大刑是故四境寧焉廉以督運而軍餉充信以撫嵩而礦徒服智以徵稅而逋欠完是故刺史稱能焉藩臬交徵公奉臬司檄藩司怒之是故服公官刑焉公既著賢聲於嵩洛未懋賞而蒙逸罰心不平之遂棄官歸陵是故飲恨而沒焉配婁孺人克相夫子實儀中饋是故稱內德焉子男三充耕儒學生歲試魁多士大科可期是故明公之遺慶焉娶婁氏充耘娶仇

氏充耒耜未娶女二長適壺關郭廉次適高平申去疾成  
化丙申十二月二十六日公生嘉靖己丑正月初七日  
公卒享年五十有四四月二十日塋孕秀塋是故為之  
銘焉銘曰於維公河渭之間其名揚伊洛之間思不忘  
公匪祿之將而善之為光匪壽之祥而惠之為昌孰奪  
爾年孰蹶爾行天道明明貽穀爾嗣終有慶太行之陽  
公即幽堂匪時月之良支壠之康公澤荒哉永無疆哉

劉太孺人墓誌銘

太孺人卒子僉憲公介書捧狀來告曰孤義不蒙於覆  
載母太孺人奄忽捐背嗟母太孺人當我劉氏家運衰  
微辛苦萬狀比孤義稍致通顯而孤義不肖不能俯仰  
於時旋即遷謫幾年來東西南北數萬里母太孺人皆  
隨孤義以驅馳涉河渭陟隴坂渡大江越太行經山海  
窺塞垣勞悴極矣茲棲於遼西將籍升斗之祿稍供子  
職乃遽及此天下之人多矣悠悠蒼天何其專降割於  
我家也孤義籲號莫迨所望仁人君子摘母太孺人之

實誌而銘之庶孤義少伸情事於萬一而母太孺人亦庶永慰於冥漠矣按狀太孺人姓朱氏汾州衛人膚施縣丞贈文林郎監察御史劉公之配山東按察司僉事公母也父諱某母某媼太孺人生而性閑慧貞謹柔嘉針絲纂組精巧絕人劉翁聞其淑女也聘為贈公配劉翁者贈公父也以貢士授朝邑縣丞廉介有聲太孺人既歸贈公務盡婦道事翁姑竭力孝敬處贈公弟妹和順無間言內外賓至中饋雖不豐腆然亦甚整潔翁姑

自慶得賢婦焉事贈公恭敬如賓贈公讀書至夜分太孺人女工亦至夜分鷄鳴燃燈促贈公起誦以是贈公學業有成提學歲試輒高選比家衆析居時贈公既屢窘於科目止有廩一石田六畝而僉事公兄弟皆幼弱日用饔餐或告乏太孺人日事針剪杼機易粟以資用又無婢僕可倚翁姑而下衣服飲食凡刀尺舂爨太孺人皆親操之艱難困苦安心處之畧無戚容故劉氏雖貧而不至凍餒者本太孺人內助之力也僉事公兄弟

既知學贈公立教頗嚴而太孺人嚴又甚二子畏太孺人過贈公一日僉事公與人奕太孺人撻其背數之曰爾父艱難育爾成立乃為此破落事宜書生之所宜為者哉嘉靖庚寅贈公以貢士授陝西膚施縣丞壬辰贈公卒于官太孺人扶柩歸塋痛贈公志有未酬每召二子語曰爾父平生篤學期登大科竟不如願汝輩宜奮勵讀書以成父志庶少慰鬱鬱之魂於地下也因泣下二子亦感泣甲午僉事公鄉試中式乙未登進士拜監

察御史推恩贈公太孺人獲封贈焉尋堂官不好僉事  
公乃謫僉事公秦州判今稍遷至按察司僉事分巡遼  
陽次子尚禮庚子鄉試中式授陝西富平縣知縣人謂  
太孺人之教至是有成而贈公之志亦可慰矣庚戌冬  
十月太孺人疾作僉事公遠近迎名醫藥皆不即功十  
一月初三日卒于正寢邇太孺人生于成化辛卯十一  
月二十一日至卒享年八十歲太孺人雖女子不事詩  
書然質美暗合有若丈夫學士者歲時享薦祖考深盛



酺醢之屬割烹炊爨手自為之一巢蔬未祭不得先嘗  
僉事公間以遷謫事告訴笑曰當時順從亦無害既任  
直取禍何恨然亦命也宗素儉不事奢靡僉事公既有  
祿製羅綺請時服之曰華服必他出方可著不從每見  
僉事公羅牲割雞輒戒曰爾俸幾何而欲日具甘旨也  
僉事公雖一錢尺布必致之太孺人而太孺人亦不以  
絲毫私與人遼陽之行僉事公以邊塞遠險非所以奉  
老親欲具疏終養請命太孺人曰不可恐人以汝為避

難也子男二長即僉事公諱尚義先為吾朝邑令治行循良建築新城起重樓曲處得宜數月工成規模宏遠然無分毫科取於民士民至今稱之娶宋氏封孺人次即尚禮娶閩氏女二長適朱濟次適靳朝用孫男四繼龍繼光繼益繼臯女四長適監生呂構次適常安次字王某次字安某僉事公等以今年某月某日啓贈公之壙奉太孺人之柩而塋焉銘曰屈之久者終必伸錫之天者感於人龍蛇之蟄以存身嚴冬之後生陽春女工

易粟資家貧孺人早歲何遭迤模灰盡荻接孟鄰慈萱  
立教過嚴椿二子文章郁彬彬鵬飛鯤化搏蒼旻食事  
昔為西臺臣孺人寵封龍章新晚年眉壽福潯臻朝夕  
祿養牲鼎陳子孫濟濟列鳳麟堂前綵服舞簪紳考終  
仙逝正八旬華表百尺磋貞珉巍巍馬鬣高嶙峋佳氣  
鬱葱永窈窕

馮翊睦公墓誌銘

睦氏世居馮翊之寺前鎮今馮翊蓋萬室之郡莫與睦

氏並焉公子祥瑞琦皆倜儻有智畧雖未究於詩書即其作止有士君子風睦氏之興三子之力也公諱教字大有少習舉子業未就乃純藝黍稷遠服賈家遂饒裕成化中携祥行貨過臨清小灘有盜詭為傭任輸于杭既成券忽有翁杖而告曰彼傭實盜也將殺汝父子矣翁忽不見公大驚故以少值構盜毀券公好施樂成人之美里之貧弗能婚喪者每資給之戚里或大會則以孝弟勤勉誨之治家尚嚴諸子姪雖甚愛也然稍涉非

道即痛懲之必改過乃與顏色公生於永樂二十年六月十五日亥時卒於弘治三年十二月初九日享年六十有五初睦氏未甚豐也公父浩永樂間商於汴拾客百金客泣尋金欲死公究客實亡金者與客金故人謂公三子之才及公不死於盜者浩與客亡金所致也配張孺人子男三長即祥次瑞次琦女三瑞男祿次楠琦男帥祥等將以嘉靖四年閏十二月十九日塋公於鎮西洛山原先塋之次來問銘銘曰楊氏放崔宋氏渡蟻

一念之仁福祉與之矧浩捐金以活汴客予匪望報天  
實鑒德乃篤生教以及于祥暨瑞暨琦家乃用昌

太行逸人墓誌銘

丁丑冬苑洛子里居婁君西以書通謁曰西固願見惟  
先生是與之苑洛子見焉西辭去苑洛子曰美哉西也  
雅而恭敏而識者也足以興乎越明年戊寅冬西又介  
書持哀來告曰孤西不穀天乃弗殛罰及于先君先君  
歿焉孤西昔得見先生於心不忘也顧先君之行泯然

無傳孤西所弗忍也惟先生是與之是孤西之志而先  
君之光也孤西斬然衰經之中莫哭焉事而弗能來也  
而又非儀也其將若之何苑洛子受之而為之銘太行  
逸人者山西澤之陵川人也性篤於孝母病護床逸人  
時為縣學生曰夫士也誦習之謂何顧因以分養吾安  
能忍之朝夕從子職即簡策也數年廢業婁氏既大家  
父老且治事逸人曰力田為秋也生子為老也夫孝者  
不勞親以立名用情者不遺近而務遠功名於我何有

哉謝儒冠而就養焉逸人善占步有司薦而官之命以  
事逸人請辭有司再命之逸人幡然曰斯不可以自見  
矣乎不然人將等我以匏瓜也捕盜而盜緝督運而運  
先里之訟者多就而求直既而曰吾已試矣夫豈吾真  
哉夫仇奸非智也司利非義也無命于上而聽于下非  
法也又將安用之乃徜徉於太行山水之中飄飄乎若雲  
外之鶴浩浩乎若海濱之鯨閑適脫落物莫得而羈焉  
自號曰太行逸人逸人姓婁氏諱璣字廷器自六世祖



裕以明經為鴻臚序班遷通判河中府復遷知青州府  
裕生斌陽信縣丞斌生彥威彥威生確確娶崔氏繼娶  
李氏實生逸人配武氏子男三長東娶李氏次南先逸  
人卒次即西縣學生娶徐氏女六長適郭惟精次適朝  
邑縣知縣王道次適都永思次適蘇朝臣次適王良臣  
次適趙相惟精永思皆縣學生孫男二曰凌雲生員曰  
凌漢女五曾孫一曰承基逸人生于某年月日時卒於  
正德戊寅十月二十一日申時享年六十有七東等將

以明年己卯正月十一日附塋於李家掌先塋之次銘  
曰太行之巔瑣瑣其石君子樂之田之宅之太行之麓  
草木蕃蕃君子封之如振如軒生與之游沒與之休彼  
太行兮仁者之儔

贈昭勇將軍潼關衛指揮使姚公暨配封太淑人

劉氏遷墓誌銘

公諱鎮字公鼎號玉崗姚氏之先古河中府六管村人  
村今隸蒲州相傳系出舜公族今其村有舜祠族人歲

時享祀幾世祖魁中元至正戊子鄉試官淮安府桃源  
縣學教諭既謝事聞河中大荒卜築揚州府興化縣遂  
為興化人桃源公與里沙善人交好里人仰重桃源善  
人名其地為桃沙庄云桃源子庸至正辛丑進士歷官  
永平知府進階右叅議永平公子五庚一庚二庚三庚  
四庚五我太祖高皇帝龍飛五庚仗劍從屢立戰功庚  
一公陞雲南瀾滄衛指揮同知庚二公遼東鐵嶺衛指  
揮使庚三公直隸潁上守禦千戶所正千戶庚四公以

小旗從文皇至北平護衛定公啓建祖也庚五公韓府  
護衛小旗庚四公生倫為公高祖補小旗陞總旗總旗  
生厚陞薊州衛百戶從文皇征北敵因留北平洪武三  
十二年文皇靖內難百戶領兵克雄縣景州真定陞副  
千戶策應永平攻夾溝火寧戰鄭村埧勝之三十二年  
戰白溝河攻濟南陞正千戶克滄州陞薊州衛指揮僉  
事大戰東昌下之扈蹕還北平三十四年二月文皇自  
將南下僉事為前鋒戰夾河藁城大捷進懷遠將軍指

揮同知三十五年克東阿戰肥河大店靈壁克泗州渡  
淮文皇入正大統論功蒙綵段襲衣白金之賜進昭勇  
將軍指揮使初文皇既舉兵平都司力抗王師不能進  
然天下素畏文皇英武乃選貌若已者十人金甲名馬  
各帥兵突出平軍望見大驚潰十人者昭勇其一也永  
樂改元之明年上以潼關中原要地調掌衛事命每歲  
正旦入朝而以衛直隸宣府賜襲衣文幣且以符驗授  
之許乘傳往來是年冬秦王入朝夜至關左右呼門甚

急昭勇曰朝廷禁門深夜不得啓也王怒止關外至京  
面上垂泣曰潼關姚指揮慢朝廷甚夜不容臣入關上  
但微笑旬日正旦昭勇來朝上問秦王不得入關事奏  
曰潼關國家重地也臣止知陛下非知秦王上顧左右  
曰如姚指揮真鎖鑰之臣賜寶鈔明年上將北幸值昭  
勇來朝勅還鎮奸細撒伏臘假僧過關緝獲斬之後聞  
言官交論不當先誅奸細者上曰言官論是但即斬奸  
細則指揮軍威大振指揮處亦是也會按西鄙事得當


上甚悅十八年四月卒上悼惜之遣官祭昭勇生深襲  
指揮使功陞都指揮同知宣德中鎮守寧夏北敵大舉  
入寇鎮守負流矢大戰斬獲甚衆捷聞賜錦衣白金名  
馬奏建潼關衛學鎮守生琮襲指揮使掌衛事配李淑  
人生公貌偉氣清讀書好古太保劉公見而愛之妻以  
仲女是所稱劉太淑人也新都楊公椿督學湖廣過關  
公謁楊旅邸楊謂其子廷和曰是兒英年美質他日佳  
士也可與交遊廷和者世所稱石齋先生也少師大學

士自是金蘭縉紳聲譽日洽云會送姑適陝西左布政  
孫公得奇疾卒於長安先一日見緋衣白馬使者曰使  
君有請不可久稽也明日雷雨大作公歸矣後以子諫  
官贈昭勇將軍指揮使太淑人既出自名族幼閑女則  
公沒時始年二十七誓欲死殉翁姑以禮制開諭從之  
自是奉翁姑撫子女以孝慈聞既而翁姑前後繼卒皆  
塋祭如禮遇婢僕以恩常曉諸子曰若輩亦人子也勿  
以奴名之姚氏內範至今井井皆太淑人遺澤云亦以



子諫官封嘉靖庚子兵備副使何君以太淑人貞節事  
言諸巡按御史樊君已覈實上聞矣公生於正統戊辰  
七月二十二日卒於成化戊戌六月二十九日得年三  
十有一太淑人生於景泰壬申十月初八日卒於正德  
甲戌十月十一日享年六十有三子男二長即諫先淑  
人卒娶曹氏太子太保豐潤伯之女次詢散官娶渭南  
張同知之女女三長適光祿少卿孫大經次適潼關衛  
指揮使黎諄次適百戶鄭簡孫男二勝祖諫之子襲指

揮使掌衛事娶靈寶楊布政女次同祖詢之子儒學生  
員卒太淑人卒時勝祖合塋公於祖塋之側宗伯周公  
洪謨嘗銘諸墓矣茲以祖塋道脩艱於時享乃卜關東  
七里玉中之金盆將以嘉靖壬寅八月二十九日遷塋  
焉來問銘銘曰姚氏閭閻世顯以武彬彬玉崗力學好  
古我思蓬麻英髦是媚方仰大成緋衣已至貞貞淑人  
恒一其德母儀婦道式我內則孝孫虔虔欲便時享遷  
於玉山金盆之崗



苑洛集卷四